

Monday, April 7, 2025

Time - 2:30pm - 2:35pm

REGIONAL NEWS BULLETIN

(MIDDAY)

SCHOOL RE-OPEN

Vawiin hi kum 2025-26 academic session-a Sikul kai tanni a ni a, zirna in te chu vawiin atang hian inhawng tanin, zirlai naupang te tan vawiin atang hian zirna kalpui tan a ni.

Akashvani News thudawn danin School tinah buaina leh harsatna awm lovin tluang takin bul tan a ni a, Hmun tam takah chuan school luh hmain admission hi tihfel a ni a, hmun thenkhatah erawh chuan school luh tan tirhah pawh admission hi la tih chhoh zel a ni a, tunkar tawp lamah chuan school kai zat tur ang angte chu an inzhiah luh fel beisei a ni.

Samagra Shiksha-in a thlawna zirlaibu a sem thin pawh kumin hian tluang takin sem mek a ni a, District tinten anmahni huamchhungah zirlaibu sem hi an buaipui a, tun kar chhoah hian zaa 80 zet chu semchhuah hman beisei a ni.

Session bul tan niah hian chawchhun pawh dan pangngaiin sem leh nghal a ni a, school hrang hrangah hian zirlaite hriat tur kaihhruaina inhrilh hriat nan leh inchinfel nan hman a ni.

Akashvani thudawn danin, Samagra thuneitute chuan kumin zirlaibu chu nikum school enrollment atanga chhutin Printing and stationary dept atangin an dawng kim tawh a, zirlaibu zaa 85 chu District office ah an pe tawh a, district office te chu school hawn hma in zirlaibu zaa 80 chu pe chhuak vek turin an hriattir tawh bawh tih an sawi a. Hetihlai hian zirlai zingah sorkar school a inziak lut lehkhahu dawn hnua private school a insawn te an awm leh thin avangin Zirlaibu la pek chhuah hmabak zaa 15 chu kumin school enrollment tih chian hunah an pe chhuak chauh dawn a, tunkar chhunga tih chian hman an tum thu an sawi a ni.

Samagra in a chhinchhiah danin, nikum khan sorkar school leh SSA-ah zirlai naupang nuai 1 leh sang 1 vel an awm a, Early childhood care & education, ECCE, pre-primary ti a sawi bawkah zirlai naupang 8000 an awm bawh a, pre-primary tana zirlaibu te hi zaa za an pe chhuak tawh thung a ni.

Mizoram sawrkar hnuaia zirna in hrang hrang te academic season chawlh hman zawh anih hnuaah vawiin khan zirna in hrang hrang hawn tan leh a ni a, sawrkar kum thar atana school bul tan ni anih angin school tam takah chuan inhlantharna hun an hmang a, hei bakah hian zirlaite fuihtharna hun te, school inkaihhruaina hrang hrang inhrilh thar lehna hun atan hman a ni bawh.



NATIONAL TRIBAL YOUTH FESTIVAL

Ministry of Tribal Affairs leh Directorate of Social Welfare, Women & Child Development Department hmalakna in National Tribal Youth Festival chu State Tribal Resource Centre, Kelsih-ah naktuk atanga hian buatsaih a ni dawn.

Ni 4 awh Festival ah hian rimawi leh hnam lam chi hrang hrang bakah Food Court, exhibition te nen hun hlimawm tak hman theih tura buatsaih a ni a, he hunah hian Nagaland atangin Imnainla Jamir, Manipur atangin Vawunchawi Vaiphei leh zaithiam hrang hrang an inlan dawn a, April ni 11 bik hi Naupang te pual bika hun buatsaih niin Department chuan he hun chhim tur hian mi zawng zawng an sawm a ni.



LENGPUI BRIDGE

Aizawl atanga Lengpui Airport panna kawng Sihhmui kaia Tlawng Lei dawh that hna thawh mek chu vawiin khan a ruangam dawh kai a ni.

Tlawng lei dawh ruangam hi vawiin khan dawh niin a tahtawlin nawr phei a ni a, chawhnu dar 1 rik hma deuhin lei hi an dawh kai nia thudawn niin tluang taka dawh zawh a ni.

Lengpui Airport kalkawnga lei dawh chungchangah hian Aizawl SP Pu Rex Zarzoliana Vanchhawng chuan thuchhuahin April ni 6 leh ni 8 inkarah lirthei eng chi mah kal tlang phal a ni dawnlo a ti a, Lengpui Airport leh Mamit lama kal tur ten Buichali lama kal a ngai dawn tih sawiin thupek chu mipuite zawm turin a ngen tih a sawi bawk.

Aizawl atanga Lengpui Airport panna kawng Sihhmui kaia Tlawng Lei dawh hna hi nikum lam atangin ngawrh taka thawh alo ni tawh a, nikum december thla khan load test a nih laiin a Lei khai kangtu cable pakhat a chah avangin lei dawhkai hna chu hun engemaw chen a khaihlak a, a helna kawngah LMV chin hnuai lam tan kal theiha siam niin Motor lian chu Buichali lama kal tura tih anlo ni tawh a ni.

Voicecast

Aizawl atanga Lengpui Airport panna kawng Sihhmui kaia Tlawng Lei dawh hi nikum October ni 30 atanga November ni 30 inkara zawh hman tura ruahman ni mahse nikum khan lei dawh kai an tumna lamah lei khai kangtu a chah avangin lei dawh hi hun engemaw chen a khaihlak rih a, kuminah Lei dawh kai tuma nasa taka hmalak thar niin vawiin khan Lei ruangam chu hlawhtling taka dawh a ni a, PWD chuan an thu ngaichang hrâm turin mipuite an ngen tih sawiin an harsatna chu hriatthiampui turin an duh tih an sawi bawk.



I&PR MINISTER

New Delhi khawpuia Statistical System tihhmasawn chungchang sawi hova State leh UT Minister-te intawhkhawmna ‘Conference on State Government Ministers on Strengthening of Statistical Systems’ inrinni-a neih ah Mizoram aiawhin I&PR Minister Dr. Vanlalhlana a tel a ni.

He intawhkhawmah hian State leh Union Territory Minister hrang hrangte bakah Central leh State mi pawimawh thahnem tak an tel a. Pu Rao Inderjit Singh, Minister of State, chuan Conference hi kaihruaiin, kalkhawmte chu State leh Union Territory-te'n sawrkar policy tha tak an duan theih nan data rintlak leh changtlung nei turin a chah a. India ram intodelh leh hmasawn siam tura hmalakna, Vikshit Bharat 2047 hlawhtling taka chuankai a nih theih nan data leh statistics behchhana thutlukna dik siam thin turin State leh Union Territory-a sawrkar fawng vuantute a fuih a. India ram pumin data leh statistic tha leh rintlak hmanga hmasawmna rah tha a tel theih nan kalkhawmte chu thawh hona tha tak nei zel turin a sawm bawk.

Conference-ah hian I&PR Minister Dr. Vanlalhlana chuan PowerPoint Presentation hmangin Mizoram sawrkar, a bikin Planning & Programme Implementation Department leh Directorate of Economics & Statistics hmalakna hrang hrang bakah hmachhawpte a sawi lang a. Data leh statistics

rintlak hmanga sawrkarin thutlukna tha zawk a siam theih dante a tarlang baw.

He inkhawmpuiah hian ram pum huapa statistical system changlung zawk neih a nih theih dan tur sawi ho a ni a. India khua leh tuite tana dataset pawimawh hmun khata dah khawmna e-Sankhyiki chu sawi ho zinga langsar zual a ni. He inkhawmpuiah hian MoSPI lehkhabu buatsaih ‘Women & Men In India’, NSSTA website leh MoSPI Micro-Data Portal-te chu tlangzarh nghal a ni.

